

## COMUNICÂT STAMPE

### WORKSHOP ROLEMED INMANEÂT DAL ISTITÛT PE CULTURE SLOVENE E ARLEF

## AL NAS IL COORDENAMENT DE STAMPE TES ALTRIS LENGHIS DAL STÂT TALIAN

Udin, ai 29 di Avost 2013 - La Rêt di Osservazion des Lenghis Emergjentis dal Mediterani (RoleMED), che si è incuintrade a Pulfar (UD) cu la colaborazion e il patrocini dal Inštitut za slovensko kulturo, de ARLeF - Agenzie pe Lenghe Furlane e dal Comun di Pulfar, e à inviât un coordinament de stampe tes altris lenghis dal Stât talian.

L'acuardi al è stât firmât miercus ai 28 di Avost dal mensîl e dal bimensîl in lenghe furlane *La Patrie dal Friûl* e *Il Diari*, dal periodic par sart *Eja*, dal setemanâl in lenghe ladine *La Usc de Ladins*, dal bimensîl e dal setemanâl sloven *Dom* e *Novi Matajur*. Il grup al à declarât la massime viertidure a altris colaborazions.

Lis testadis a àn cjpât part ae taule taronde indulà che a son stadis analizadis lis cundizions de informazion tes lenghis emergjentis de aree dal Mediterani (maltês, barbar, catalan, furlan, sloven e ladin). I rapresentants de stampe tes lenghis minoritariis in Italie a àn decidût di meti adun chest coordinament par favorî la cognossince reciproche e il scambi di informazions jenfri i mieçs di comunicazion che a doprin altris lenghis dal Stât talian. A chesto prime declarazion di finalitâts firmade a Pulfar al larà daûr un altri document programatic.

A coordinâ lis voris dal RoleMED, viertis dal sindic di Pulfar, Piergiorgio Domenis, e de presidente dal Inštitut za slovensko kulturo, Bruna Dorbolò, al è stât il diretôr de ARLeF, William Cisilino, che al à rimarcât la impuartance dal acuardi tant che "strument di lavôr che al va te direzion indreçade ançe de Union Europeane che e viôt i mieçs di comunicazion tant che sogjets fundamentâi pe politiche linguistiche".